

# KAOKAN

## ANA EUANGKERIO IESU KRISTO





## TE ATUA BON TAMAM ARE I KARAWA AE TANGIRIKO

Te Atua bon Tamam are i Karawa. E atai aro arom nako ao e tangiriko riki nakon are ko ataia. E tangiriko bwa ko na kukurei n te maiu aei ao te maiu are akea tokina.

Ibukin kakoroan nanon te kaanta-ninga aei, E a tia ni katauraoa te babaire ae aranna ana **euangkerio\*** Iesu Kristo. Iesu Kristo bon Natin te Atua, Maiuna ao Ana reirei bon bwaai ni kairi nakon te rau n te maiu aei ao te kukurei nakon te maiu are akea tokina.

*E a tia Tamara are i Karawa ni uota rikaaki—kaoka—koaua aika mai iroun te Atua are ko kona n reiakin ma ni maiuakin. Koaua aikai a kaotaki nakoia burabeti man te moan tai.*

## TE EUANGKERIO E KAKABWAIAI UTU AO AOMATA N TATABEMANIA NAKO.

Ana Euangkerio Iesu Kristo e kakabwaiaia ni kabane naake a butimwaia ao ni maiuakinna. Teuana te tabo mai buakon taabo aika moan te tamaroa ibukin reiakinan ao kamwakuran te Euangkerio bon te Utu. E a tia te Atua ni katei utu bwa ana uota te kukurei nakoia Natina, bwa ti aonga n reiakin tuua n te tabo ae tatangiraki, ao ni katauraoira n Okiria imwina ngkana ti mate. E ngae ngke te irekereke inanon te utu n tabetai e kangaanga, Tamara are i Karawa e kakabwaiaira ngkana ti kekeiaki n toui mwin ana reirei Iesu Kristo. Reirei aikai a na buokira ni kakorakorai ara utu.

## TAMARA ARE I KARAWA E KAOKA ANA EUANGKERIO

Ni kanoan Ana kainibaire, te Atua e rineia ana burabeti n aron Atam, Nooa, Aberaam, ao Mote. Burabeti:

- A reirei taekan te Atua ao bon taan kakoaua aika onoti ibukin natina ae Iesu Kristo
- A butimwaea te **kaotioti**, ke te kairiiri mai iroun te Uea.

\*A kabwarabwaraaki taeka ake a mwaakenaki n te uraura n itera ni baa 18 ao 19.

- A reiakina te Euangkerio nakon te aonaaba, ao a raira nanon ana taeka te Atua.

Burabeti a karekea te **nakoanibonga**, ke te kariaiakaki n taetae ao ni mwakuri n aran te Atua ni kairiia Natina. Aomata aika toui mwiia burabeti a na karekei kakabwaia ake E a tia ni berita iai te Atua nakoia. Naake aki butimwaea te Euangkerio ao ana burabetti te Atua a na aki karekei kakabwaia ao a na raroa nako ngaia ma te Atua. Naake aaki butimwaia burabeti ao a katikui mwiokoaia n toua mwin te Atua a na tiku iaan are e aranaki bwa **kitanan te koaua**.


**Koaua ake a kaotaki a bua ngke aomata a totokoia burabeti.**

E ngae ngke a mwaiti Natina aika a tia n totoko n aki kan ongo Irouna ao irouia Ana burabeti, E teimatoa Tamara are i Karawa n tangiriia Natina. E tangiria ni kan anganiira bwaai ni kabane ake ti kainanoia bwa

ti na kukurei iai ngkai ao n oki Nakoina imwiin matera. A aki toki ni kaokaota Ana kawai te Atua ni kan roko irouia natina, booki aika tabu, e ngae ngke ti aki ongo Irouna n tai nako.

- Te Atua E rinea te burabeti.
- Te Burabeti e reirei te euangkerio ao e kairiia aomata.
- Te Atua e kakabwaiaia aomata.
- Aomata a tabe teutana i mwiin teutana n aki kan maiuakin ke n aki kan ongo nakon ana reirei te burabeti. N tokina aki kan ongo iroun te burabeti ma ana reirei ao a kitana te koaua.
- Ibukin kitanan te koaua, ao aomata e a bua mairouia ataakin te euangkerio. Ao e a naaki te Nakoanibonga mairouia.
- Ngke a nakoraoi te tai ao aomata a tauraoi ni manga Iria, e a manga rinea riki temanna te burabeti te Atua, e kaoka te nakoanibonga ao te Ekaretia, ao E babairea te burabeti bwa e na reiakina te euangkerio.

\*A kabwarabwaraaki taeka ake a mwaakenaki n te uraura n itera ni baa 18 ao 19.





## **IESU KRISTO E KATEA ANA EKARETIA.**

Man tain te Karikibwai, ao natin nako te Atua a ingainga nanoia ni kan noora te Tia Kamaiu Iesu Kristo. N aron are e a tia ni berita iai, Tamara are i Karawa, E karuoa Natina te Mwaane, Iesu Kristo, nakon te aonaaba 2,000 te ririki n nako.

E maiukina te maiu ae kororaoi, man itiaki, Iesu Kristo. E katea ana Ekaretia, e reirei Ana euangkerio, ao ni karaoi kakai ai-ka mwaiti. E rineia aomata aika tengaun ma uoman bwa Ana **Abotoro**, n ikotaki ma Betero, Iakobwa ao Ioane. E reireiniia ao man anganiia te kariaiakaki ibukin te nakoanibonga bwa ana kona n reirei n Arana ao ni karaoi **otenanti** aika tabu, n aron te **bwabetito**.

Ngke e katea Ana Ekaretia Iesu, E karekei kaetieti mairo-un Tamara are i Karawa. E a manga angania Ana reirei kae-tieti. Iesu e reireinia naake a iriiria bwa te kaotioti mairoun te Atua bon te bwaa are e na katea iai Ana Ekaretia.

**E** *bairea Ana Ekaretia Iesu Kristo:*

- *E weteia ao e katabuia Abotoro.*
- *E anganiia Ana Kariaia n reirei ao ni bwabetito. Te kariakaki aei e atongaki bwa te nakoanibonga.*
- *Imwiin matena ao Mangautina, E teimatoa ni kairia Abotoro rinanon te kaotioti.*

N tokin maiuna, E korakai ao E mate i bukin aia bure aomata ni kabane ake a tia ni maiu ke ake a na maiu n te aonaaba. Te angano aei e aranaki bwa **Ana Mwakuri ni Kamaiu Iesu**. Inanon Korakaina, matena ao **Mangautiina**, te Tia Kamaiu e karekea te anga I bukin kabwaraan ara bure. Naake iai aia onimaki irouna, a rairi nanoia ao ni kawakin ana tua ana karekea kabwaraan aia bure ao a na kaonaki nanoia n te rau ao te kimwareirei.

Imwin Mangautina, Iesu Kristo e kairia ana abotoro rinanon te kaotioti. Iai kawai aika mwaiti ake a tauaki mwiia n te Bwaibwara are e teimatoa iai ni kaira ana Ekaretia (nora Mwakuri 10; Kaotioti 1;1). Ngaia ae ana Ekaretia Iesu Kristo e bon kairaki iroun te Atua ao tiaki irouia aomata.

\*A kabwarabwaraaki taeka ake a mwaakenaki n te uraura n itera ni baa 18 ao 19.

## KITANAN TE KOAUA AE KORAKORA

Bon imwin maten Iesu Kristo, ao aomata aika buakaka a bwaini-kiriniia ao man tiringia kaain te Ekaretia aika mwaiti. Tabeman kaain te Ekaretia a tia ni karaurau ni kitani tuua ake e a tia n

*Mani mateia ana Abotoro  
Iesu Kristo te koaua e a  
manga bua riki.*

reiakin Iesu Kristo ao ana Abotoro. A tiringaki tenaan Abotoro, ao te kariaiakaki are e reke man te nakoanibonga—n ikotaki ma kiing ibukin kaotakin ao karekean kaotioti ibukin te Ekaretia—a boni bane n anaaki

man te aonaaba. Ao ibukina bwa e aaki kairaki te Ekaretia man ana kariaia te nakoanibonga, ao e rikirake te kaairua n rin inanon ana reirei te Ekaretia. A teimatoa n tiku aomata aika raraoi n ikotaki ma koaua aika mwaiti, ma te euangkerio are e a tia ni kateaki iroun Iesu Kristo e a bua. Te tai aei are e atongaki bwa Kitinan te Koaua ae Korakora.

Kitanan te koaua aei, e karekea teia aro aika mwaiti ma aia reirei aika a kakaitara. N te tai aei, ao a mwaiti mwaane ao aine aika a ukoukora te koaua, ma aki kona ni kunea. A mwaiti aomata aika tamaroa aika a kakoaua te Atua ao Iesu Kristo mani kataia n ata ao n reirei te koaua, ma akea irouia bwaninin te euangkerio ke te kariaiakaki n te nakoanibonga. Ibukin aei, rooro nako a tiku irouia te aro ni kan kitana te koaua are e uotaki nakoia man aia kairoro rooro ake i mwaia, n ikotaki ma bitaki nakon ana euangkerio Kristo.

Aomata tabeman ake iai irouia te kona ni kairiiri, n ai aron Martin Luther ao John Calvin, a ataia bwa taian waaki ma reirei a tia ni bitaki ke ni bua. A kataia ni bita te Ekaretia are a kaaina. Ma e ngae n anne, akean te kariaia man te Nakoanibonga, ao ana, Ekaretia Kristo e aki kona raoi n okira arona are mai imwaina. E a kainnanoaki **kaokakina**.

\*A kabwarabwaraaki taeka ake a mwaakenaki n te uraura n itera ni baa 18 ao 19.

**E** ataia te Atua ae e na iai kitanan  
te koaua. Rinanon te burabeti n  
te O Tetemanti, E taku:

“Nooria a na roko boong . . . aika N na  
kanakoa iai te rongo nako aon te aba,  
ae tiaki te rongo n te amwarake, ao tiaki  
te taka n te ran, ma te rongo ni kan  
ongo ana taeka nako te Uea:

“Ao [aomata] a na tiotio nako man  
taari teuana nakon taari teuana, ao mai  
meang n toki i mainiku, ao ane a na  
biribiri ni ukoukora ana taeka te Uea,  
ao e na aki reke irouia.”

**Amota 8:11–12**



## KAOKAKIN TE EUANGKERIO

N 1820, n aron are ea tia ni karaoia n taai ake ngkoa, Tamara are i Karawa e a manga rinea riki temanna te burabeti bwa e na kaoka te euangkerio ao te Nakoanibonga nakon te aonaaba. Aran te burabeti anne bon Iotebwa Timiti. Ngke te teinimwaa-ne ngaia, ao e rootaki n te nanououa Iotebwa n te kakaokoro imarenaia Ekaretia n ana kaawa ao e tangiria ni kan ataia bwa e ngaa iai te Ekaretia ae koaua. Ibukina bwa e ataia bwa e me-meere ana atatai, ao e ira te reirei are e kunea n te Bwaibara, “Ngkana akea ana rabakau temanna i buakomi, ao e na butiia te Atua, ae tituaraoi n angangania aomata ni kabaneia, n aki ngurengureakeinia; ao e na bon anga-naki” (Iakobo 1:5).

E a motika nanona Iotebwa Timiti bwa e na titirakina te Atua bwa tera ae riai ni karaoia. Ngke e tataro Iotebwa ni kakaea te koaua, Tamara are i Karawa ao Iesu Kristo a kaoti nakoina. Iesu e tuanga Iotebwa bwa a na akea te eka-retia teuana ae na kaainna, bwa “a bane ni bure” ao “a kaniia nakoiu ma riaia, ma a raroa nanoia mairou, a reia-kin reirei ma aia tua aomata aika tara n roko mairoun te Atua, ma a kakewea te mwaaka are iai.” (Iotebwa Timiti—History 1:19).

N aro are e a tia ni karaoia te Atua na-kon Atam, Nooa, Aberaam, Moote, ao burabeti riki tabeman, E wetea Iotebwa Timiti bwa e na riki bwa te burabeti are ngaia are e na kaoka bwaninin te euangkerio.

**I**otebwa Timiti e nora  
Tamara are i Karawa ao  
Iesu Kristo. Man te atatai  
aei, ao e taku:

“I noora te boua n oota ae  
bon tei raoi i etan atu ae  
riaon ootan taai, are e ruo  
ni karaurau ni karokoa e  
roko iaou. . . .

“Ngke e rabunai te ota I  
nooria Aomata aika uoman,  
ae akea aron kabotauan  
otaia ma mimitongiia, ae a  
tei ietau n te ea. E taetae  
temanna nakoiu, e weteai n  
arau ma n taku, ni kotea are  
temanna—Aio natiu te  
Mwaane ae moan te  
Tangiraki. Ongo Irouna!”

**Iotebwa Timiti—History  
1:16–17**

## Kaokan te Nakoanibonga

N te 1829, ao e karekea te kariaiakaki n te nakoanibonga Iotebwa Timiti ae ti tabo ma are e anga Iesu Kristo nakoia Ana Abotoro. Ioane te Tia Bwabetito, are e bwabetitoa Iesu, e kaoti nakon Iotebwa Timiti ao man anganna te **Nakoanibonga are te Aron**, ke te nakoanibonga are inano riki. Betero, Iakobwa ao Ioane (ana moan Abotoro Iesu Kristo ake teniman) a kaoti nakon Iotebwa Timiti imwiina ao anganna te **Nakoanibonga are te Merekiteraka**, ke te nakoanibonga are rietaata riki.

Imwiin karekean te kariakaki n te nakoanibonga, e tuangaki Iotebwa Timiti bwa e na manga katea ana Ekaretia Iesu Kristo iaon te aonaaba. Rinanona, ao E a manga weteia Abotoro ake Tengaun ma Uoman Iesu Kristo.

*Iesu Kristo E kanakoa  
Ioane te tia Bwabetito ao  
imwiina teniman ana  
Abotoro bwa a na angan  
Iotebwa Timiti te kariakaki  
n te nakoanibonga.*

N aron are e kairia Ana Abotoro Iesu Kristo rinanon te kaotioti imwiin Manga Utina, E teimatoa ni kaira te Ekaretia ni boong aikai rinanoia burabeti ao abotoro aika maiu ni boong aikai. Ana Beretitenti Ana Ekaretia Iesu Kristo Ibukiia Aika a Itiaki Ni Boong Aika Kaitira bon ana burabeti te Atua ae a tia n rineaki ni boong

aikai. Ngaia, ma ana kauntira, ao Abotoro ake Tengaun ma Uoman iai irouia te kariaiakaki n te nakoanibonga n aron are irouia burabeti ao abotoro n taai ake ngkoa. Aomata aikai bon burabeti, taan mamata, ao taan kaotioti.

\*A kabwarabwaraaki taeka ake a mwaakenaki n te uraura n itera ni baa 18 ao 19.

*Betero, Iakobo, ao Ioane—Ana Abotoro Iesu Kristo—angan Iotebwa Timiti te Nakoanibonga ae te Merekiteraka.*





## ANA BOKI MOOMON

Te Atua, E anganira ana Boki Moomon: Kakouan naba Iesu Kristo, bwa mwakoron kaokan te euangkerio: E raira te boki aei Iotebwa Timiti ni mwaakan te Atua man rekooti ni kawai ake a koreaki iaon bwaatua aika koora, Ana Boki Moomon bon “rekootin ana mwakuri te Atua ma kaain Amerika ngkoa, ao iai i nanona, n aron te Bwaibwara, bwaninin taekan te euangkerio are akea tokina” (te kabwarabwara nakon Ana Boki Moomon).

Ana Boki Moomon aei bon te kakoaua ae korakora ibukin Iesu Kristo. E buo-kiira ni kaotaira N ana reirei, n ikotaki ma ake a koreaki n te Bwaibwara.

Ana Boki Moomon bon te bwai ni ka-koaua ae kamataata Kaokan te eua-ngkerio rinanon Iotebwa Timiti. Ko kona n ataia bon iroum bwa e koaua ana Boki Moomon. Karekean te ata-tai aei, ko riai ni warekia, iangoa raoi rongorongona, ao ni kan ataia raoi bwa e bon koaua. Ko riai n titirakina Tamam are i Karawa ni kamatoa bwa bon Ana taeka. Ngkana ko karaoa aei ao E na kaotia nakoim rinanon te **Tamnei ae Raoiroi** bwa e bon koaua.

Ngkana ko ataia bwa e bon koaua ana Boki Moomon, ao ko na kakoaua naba man te Tamnei ae Raoiroi bwa Iotebwa Timiti bon ana burabeti te Atua, bwa ana euangkerio Iesu Kristo e bon kaokaki rinanona, ao bwa Ana Ekaretia Iesu Kristo Ibukiia Aomata Aika Itiaki Ni Boong Aika Kaitira e kairaki iroun te burabeti ao abotoro ni boong aikai.

*Ko kona n ataia bwa tera  
ake a tia n reirei iai mitinare  
a boni koaua ngkana ko wa-  
reka ao man tataro ibukin*

*Ana Boki Moomon:*

*“Ngkana ko bubuti ma te  
nano ae koaua, te iango ae  
koaua ma te onimaki iroun  
Kristo, e na kaotaki koauana  
nakoim, man mwaakan te  
Tamnei ae Raoiroi.*

*“Ao mani mwaakan te  
Tamnei ae Raoiroi ko kona  
n ata koauan bwaai  
ni kabane.”*

**Moronaai 10:4–5**

\*A kabwarabwaraaki taeka ake a mwaakenaki n te uraura n itera ni baa 18 ao 19.

*A koreaki taekan mwanangan Iesu Kristo nakoia I- Amerika n Ana Boki Moomon.*

## N NA KANGA N ATAIA BWA A KOAUA BWAAI AIKAI?

Ko kona n ataia bwa te rongorongo aei e bon koaua. Ngkana ko titirakina Tamam are i Karawa n te tataro, ao ko kona ni karekea te kaeka ma Irouna rinanon te Tamnei ae Raoiroi. E

### **N** na Kanga n Tataro?

- *Mwanewea aran Tamam are i Karawa.*
- *Kaota ana namakin nanom (kakaitau, titiraki, bubuti ibukin kamatoaan koauan Ana Boki Moomon ao tera ae a tia n reirei mitinare).*
- *Kainna (“N aran Iesu Kristo, amen”).*

aranaki naba te Tamnei ae Raoiroi bwa Tamnein te Atua, ao teuana mai ibuakon Tabena bwa te tia kakaoua, ke kakoauaan, te koaua.

E kona te atatai aei ni kamiimi ao ni bita aron maium, ma e roko n taai-nako bwa te koaua ae rau, n akea kaotakin koauan mwaakan te Atua. Te Tamnei ae Raoiroi e kamatoa te koaua rinanon te namakin, iango, ao katooto. N aron ae ti reireinaki iai man te Bwaibwara, “Ao uaan te Tamnei bon te tangira, kimwareirei, te rau, te taotaonaki n nano, te atataiaomata, te raoiroi, te onimaki, te

nimmamannei, [ao] te taubaang” (I-Karatia 5:22–23). Namakin aikai mai iroun te Tamnei ae Raoiroi bon kaotioti nakoim bwa ana euangkerio Iesu Kristo are e kaokaki rinanon Iotebwa Timiti e bon koaua. Ko na kainnanoia ngkanne bwa enga ae ko na n rineia bwa ko na maeka ma te rau ma te atatai are ko a tia ni karekea.



## RINANIN TAEKA AIKA BWAINAKI

**Nakoanibonga ae te Aaron** Te nakoanibonga are mangori riki. E ikotaki inanon te nakoanibonga aei te kariaiakaki ni bwabetito ao e aranaki n aran Aaron n te O Tetemanti n te Bwaibwara.

**Kitanan te Koaua** Ngkana, aomata n tatabemania nako, te Ekaretia, ke te aba ae bwanin e katuka ke e kamauna ana euangkerio Iesu Kristo. Kitanan te koaua e reke man te kakaokoroaki, te nanououa, ao man buan te kariaiakaki n te nakoanibonga, ke te inaomata ni mwakuri n aran te Atua.

**Abotoro** Te ara ae Iesu Kristo E anganiia mwaane ake tengau ma uomani ake E rineia bwa Ana aomata aika e rangin ni kaan ma ngaia n Ana tai ni mwakuri n te aonaaba ao ngaiia naba ake E anganiia te kariaiakaki bwa a na mwakuri N Arana. N taai aikai, Iesu Kristo e a tia ni weteia mwaane riki tabeman bwa a na riki bwa Ana Abotoro. N aron taai ake rimoa, te Abotoro bon ana tia kakoaua Iesu Kristo ae onoti ae iai naba irouna te kariaiakaki mairouna.

**Mwakuri ni Kamaiu** Te tai are ti kona iai ni kaiokaki ma te Atua. Te mwakuri ni kamaiu, bon karaoran te rekenikai ibukin te bure, are e a kona iai ni kanakoi mwiin buure mairouia taani bure ake a tia n rairi-nanoia. Ti Iesu Kristo ae kona ni karaoa te Mwakuri ni kamaiu ae kororaoi ibukiia aomata ni kabane. Ana Mwakuri ni kamaiu e irekereke ma Marakina ibukin ara bure, tiinakon Raraana, ao Matena ao Mangautina. Ibukin te Mwakuri ni kamaiu, aomata ni kabane ake a tia ni maiu a na manga bane ni kautaki. Te Mwakuri ni kamaiu e katuraaoa te kawai ibukira nakon te kamaiuaki man ara bure ao ni mae-ka ma te Atua n aki totoki.

**Bwabetito** Te kawai ae kakawaki ibukin karekean kabwaraan bure. Ti kona n riki bwa kaain ana Ekaretia Iesu Kristo Ibukiia Aomata Aika Itiaki Ni Boong Aika Kaitira, rinanon te bwabetito ao te kamatoaki irouia kaain te nakoanibonga ake iai irouia te kariaiakaki. Te bwabetito n te kateboaki, e nanonaki bwa te aomata are e bwabetitoaki e na bon bane rabwatana ni kabane iaan te ran n te tai ae aki maan. Te Bwabetito e kaota nanora ni kan ira ana katooto Kristo ao ni karaoi berita ma te Atua.

**Euangkerio** Ana kainibaire Tamara are i Karawa ibukin karekean te rau n te maiu aei ao te kukurei nakon te maiu are akea tokina. E boboto te

euangkerio iaon ana Mwakuri ni kamaiu Iesu Kristo ao e tangiriira bwa e na iai iroura te onimaki Irouna, rairannano, bwabetitoaki, karekea te Tamnei are e Raoiroi, ao te tei matoa ni uaa te toki.

**Te Tamnei ae Raoiroi** E atongaki naba te Tamnei ae Tabu, Tamnein te Atua, ao te Tia Raoi. E kakoaua, ke kaota, Tamara are i Karawa ao Iesu Kristo ao e kaoki man reirei taikan te koaua.

**Te Nakoanibonga ae te Merekitereka** Te nakoanibonga ae rietaata riki ke ni korakora. E aranaki ibukin Merekitereka n te O Tetemanti n te Bwaibwara, ao te kabanea n etieti ao n rietata n ibonga ao n uea.

**Otenanti** Te mwakuri ae tabu, are karaoaki man te kariakaki n te nakoanibonga. Te katooto teuana bon te bwabetito.

**Nakoanibonga** Ana kariaia ao mwaakan te Atua. E anga te mwaaka aei te Atua nakoia mwaane bwa a na mwakuri n Arana. Te Nakoanibonga ae te Aaron e kaokaki nakon Iotebwa Timiti iroun Ioane te Tia Bwabetito, are e bwabetitoa Iesu. Te Nakoanibonga are te Merekitereka e kaokaki iroun Betero, Iakobo ao Ioane, teniman ma ibuakoia ana Abotoro Iesu ake tengau ma uomana..

**Kaokan Bwaai** Kaokan bwaai n aroia ngkoa manga kateana; ao manga kaokana nakon te bwai ae boou. Imwiin buan te koaua ao te kariaakaki man te aonaaba, e a manga kaokaki te euangkerio rinanon te Burabeti Iotebwa Timiti. Kaokan bwaai e kaokoro ma manga kateana bwa *manga kateana* e nanonaki ikai bwa katamaroan te bootaki ke te mwakuri ae iai ngkai n te kantaninga are e na manga kona n okira arona ngke e moan kateaki, ma *kaokan bwaai* e nanonaki ikai manga katean ke kabouan te bootaki ke te mwakuri n arona ni kabane

**Te Mangauti** Imwiin te mate n rabwata, manga bootakin te tamnei ma te rabwata ae a nako raoi ae te iriko ao te rii. Iesu Kristo bon te moan aomata ae mangauti.

**Kaotioti** Te reitaki imarenan te Atua ma natina nako, ni bon arona n rinanon te Tamnei ae Raoiroi. Aomata n tatabemania nako A kona ni karekea te kaotioti ibukin kairan maiuia, ma ti ana burabeti te Atua are E a tia n rineia ae e kona ni karekea te kaotioti ibukiia kaain aonaaba ni kabane. E kona n roko te kaotioti n aekakiia aika mwaiti, ma e roko n anguin te tai bwa iango, namakin, ao katooto.

## REIREI RIKI TABEUA

Titiraki ao booki aika tabu aikai a na buokiko n reireiniko riki tae-kan moan tuua n te boki ni kairi aei ao ni iangoi raoi. A bon aki ta-bwanin titiraki aikai; kabwarabwara ma inano ao kaitaraia ni booki aika tabu a na kairiko nakon kiibu ma bwaai n reirei riki tabeua.

**Tera ae ko nanonna bwa te Atua bon Tamam are i Karawa?**

Maraki 2:10 (Bwaibwara, O Tetemanti)

Ebera 12:9–10 (Bwaibwara, Nu Tetemanti)

---

---

**Tera taben te Burabeti? Bukin tera ngkai e kakawaki ataakina bwa te Atua e taetae nakoia burabeti?**

Amota 3:7 (Bwaibwara, O Tetemanti)

Iakobwa 4:4–6 (Ana Boki Moomon, itera ni baa 128)

---

---

**Tera ae nanonaki n reken te kariaiakaki n te nakoanibonga?**

**E na kanga temanna ni karekea te kariaiakaki aei?**

Mataio 10:1 (Bwaibwara, Nu Tetemanti)

Ioane 15:16 (Bwaibwara, Nu Tetemanti)

---

---

**Tera ae na riki ngkana e bua te kariaiakaki anne?**

Amota 8:11–12 (Bwaibwara, O Tetemanti)

1 Nibwaai 13:24–29 (Ana Boki Moomon, itera ni baa 26–27)

---

---

**Ataia ana Abotoro Iesu ae kitanan te koaua e na riki ?**

Mwakuri 20:28–31 (Bwaibwara, Nu Tetemanti)

2 I-Tetaronike 2:2–3 (Bwaibwara, Nu Tetemanti)

2 Timoteo 4:3–4 (Bwaibwara, Nu Tetemanti)

---

---

---

**Tera nanona nakoim bwa ana euangkerio Iesu Kristo e a tia  
ni kaokaki nakon Iotebwa Timiti?**

*Ana kakoaua te Burabeti ae Iotebwa Timiti (boki ni kairi)*

---

---

---

**Tera Ana Boki Moomon? E kanga n riki bwa te kakoaua nakon  
nakoan Iotebwa Timiti ae te burabeti?**

Aran ma Rinanin Taian Boki Inanon Ana Boki Moomon

Kabwarabwara n Ana Boki Moomon

---

---

---

**Tera ana mwakuri te Tamnei ae Raoiroi?**

Aramwa 5:45–47 (Ana Boki Moomon, itera ni baa 236-237)

Moronaai 10:3–5 (Ana Boki Moomon, itera ni baa 596)

---

---

---

## TAROMAURI MA NGAIRA

---

NAKOMAI AO NORIA BWA E NA KANGA TE  
EUANGKERIO AE KAOKAKI NI KAKABWAIA MAIUM



Te bootaki n toa bon ngaia oin ara botaki n taromauri. E tataneiai n toki tabeua te tai imwin teuana te aoa ma ni waakinaki n aron aei:

*Anene:* E aneneaki irouia kaain te taromauri. (Iai Booki n Anene.)

*Tataro:* E karaoaki irouia kaain te aro aika kaain te tabo.

*Te toa:* Ta kariki ao te ran a kakabwaiaki ao a kabutaki nakoia aomata ni kauringa ana Mwakuri ni Kamaiu Iesu Kristo

*Taan taetae:* N taai nako temanna ke uoman mairouia kaain te ekaretia aika a na mwiokoaki bwa a na taetae iaon atun reirei n te euangkerio.

*Kunnikai:* Mwaane ao ataeinimwaane ana bwaini kawaerake aika mwarairai man n tamaroa ma te kabaraaki ao te neketai. Aine ao ataeinnaine ana bwainia ni kunnikai ke ni kamumun aika mwarairai.

Anga nano aaki kariaiakaki n tain te taromauri

Ti kaoko naba bwa kona iri bootaki riki tabeua, ni kaineti ma are mamaten nanom ao am karinan n rooro . Karinanin ao tain bootaki aikai a kona ni kakaokoro.

*Reirei n Taabati:* Kiraati ibukin reirei ni booki aika tabu ao ana reirei n te euangkerio.

*Bootaki n te Nakoanibonga:* Kiraati ibukiia mwaane ao ataeinimwaane man te ririki 12 ao iaona riki.

*Te Bootaki n Aine;* Kiraati ibukiia aine man te ririki 18 ao iaona riki.

*Ataeinaine;* Kiraati bukiia ataeinaine man te ririki 12 nakon te 18.

*Moanrinan;* Kurubu ni mwakuri ni ibuobuoki ao kiraati i bukiia ataei n te roro ae 3 nakon 11. E na iai n taainako taan tararuauia ataei ibukiia te roro ae 18 aia namakaina nakon 3 te ririki.



Tain bootakin toa: \_\_\_\_\_

Ana atureti te tabo n taromauri: \_\_\_\_\_

# Tera ae n na riai ni karaopia?

- Wareka ana Boki Moomon.

Wareware riki tabeua: \_\_\_\_\_

---

---

---

- Tataro bwa kona ataia bwa Iotebwa Timiti bon te burabeti ao ana Boki Moomon bon ana taeka te Atua.

- Kaea te taromauri.

- Katia mai nanom bwa kona toua mwin te Tia Kamaiu ni bwabetaaki. Bong ni bwabetito \_\_\_\_\_

- Nakon [www.mormon.org](http://www.mormon.org) n reiakina riki taekan manga kaokan ana euangkerio Iesu Kristo.

- Teimatoa ni bobotaki ma mitinare n reiakin riki ana koaua te Atua ae e a tia ni kaokia rinanoia ana burabeti ni boong aikai

Te kaitibo imwiina: \_\_\_\_\_

Araia Mitinare ma nambwan aia tareboon:

---

---



ANA EKARETIA

IESU KRISTO

IBUKIIA AIKA ITIAKI

NI BOONG AIKA KAITIRA

[www.mormon.org](http://www.mormon.org)

Karabwarabwa ibukin Tamnei

Tinanikun te boki mai moa: Te Tilbu ae Bua, iron Del Parson. © Del Parson. Tai kaewea

Itora ni baa 2 iron Steve Bunderson

Itora ni baa 5: Kabwarabwara ma iron Te Burabeti Itala E Taetae ni Burabeta Bungiaikin Kristo, iron Harry Anderson

Itora ni baa 6: Kabwarabwara ma iron Kristo ngke e Katabulia Abotoro ake Tengaua ma Uoman, iron Harry Anderson

Itora ni baa 13: Kabwarabwara ma iron Kaokan te Nakoainibonga ae te Merikitereka, iron Kenneth Riley

Itora ni baa 14: Kabwarabwara man Mwanangan Jesu Kristo nakoia kaain Amerika, iron John Scott

Itora ni baa 17, 22, 23 iron Steve Bunderson

KIRIBATI



4 0201148859 2  
01148 859